

PETRUQ

Htang Dàm Hun Kat é Laiká

(2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dngmán hkyô dông, ngamoq su, hpaù dik é lumjínq hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsîng Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyî sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô dông nga-nhúng lé ji yù Sù lé nga-nhúng sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyo é matú nga-nhúng râ é jung hkangmó lé byi bê nghut ri. ⁴ Haú pé dông mai, Yhang gi, Yhâng é kô dik, hpaù dik é danggidiq pé nga-nhúng lé byi bê nghut ri; haú hkûn, nungmoq gi, haú danggidiq pé dông mai, Garaî é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsîng gùng yhumsîng hkang é hkyô lé, yhumsîng gùng yhumsîng hkang é hkyô má jân shirang é hkyô lé, jân shirang é hkyô má tarâ hkunggâ é hkyô lé, ⁷ tarâ hkunggâ é hkyô má gumang chyitkâng myit lé, gumang chyitkâng

myit má chyitdap myit lé, jat yù keq. ⁸Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsîng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹Nghut kôlhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luî, lai lò bê yhâng é yubak mara pé mai lhoq sanséng byî é hui bê hkyô lé, tô-myhî pyâm bê sù nghut ri.

¹⁰Haû mù luî, ngá é gumang wuê ê, nungmoq lé ji yu é hkyô eq hkyin yu é hkyô lé, je riyhang lhoq gingtîng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹hau htoq agó, nga-nhông é Yhumsîng eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹²Haû mù luî, nungmoq gi, hau pé lé sé kô é htoq agó, nungmoq wó tô é tengmán hkyô má gingtîng nyi kô é nghut kôlhang, ngò, nungmoq lé hkâ-nhám le hau pé lé ru lhoq pûn nyi râ nghut lhê. ¹³Shî gungdu má ngò rû dui nyi nyi gi, nungmoq lé lhoq pûn kying byî le ge ri nghû, ngò wó myit ri; ¹⁴haû mù gâ le, nga-nhông é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyâm to râ nghut é lé sê lhê. ¹⁵Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng naù mù, ngò, wó dut é í shikut nyi râ nghut lhê.

¹⁶Nga-nhông é Yhumsîng Yesuq Hkrisduq é a-tsam eq lé lo é hkyô eq séng luî, nungmoq lé ngamoq taî kyô wú é hkûn, ngamoq gi, kut htoq yu é labyoq mhô-myi lé a

châng é za, Yhâng é kô làm hkikhkâm hkyô lé myoq èq myang é saksé pé nghut lhê. ¹⁷ Hkâsu mù gà le, haû Kô Làm Hkikhkâm Hkyô é Hpungwup Shing kang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."[☆] ga taí é htê, Yhâng chyáng jé é hkûn, haû Îwa Garai Gasâng chyáng mâ é aróng eq hpungwup shing kang lé Yhang wó hap yù bê nghut ri. ¹⁸ Ngamoq yhang, chyoyúng bùm má Yhang eq rahá nyi tô é hkûn, htê haû mauhkûng mai htoq lo é lé wó gyô é nghut lhê.

¹⁹ Haû mù luí, myiqhtoí pê dang lé je lhoq ging bê hkyô, ngamoq wó é nghut lhê; haû mù, maubô lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê.

²⁰ Banshoq htoq má, Chyúmdang mâ é myiqhtoi dang gi, haû myiqhtoí pé mai ó le ó lichyúm lhoq htoq yu é đông a nghut é lé, nungmoq sê to râ dut lhê. ²¹ Hkâsu mù gà le, myiqhtoi dang gi, byù ô nau é đông hkâ-nhám lé a htoq wú é za, haû Chyoyúng Woi-nyí èq shuí u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pê É Hkyô

¹ Nghut kôlhang, myiqhtoi pyoq pé gi, Israelaq byù haú bâng é ahkaû má nyi wú bê nghut lhê, haû eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wuì yu é, Yhumsîng lé lháng he-ngik pyám kó râ nghut lhê. Haû mù, yhangmoq gi, yhumsîng gùng yhumsîng byòdàn tung htên byoq hkyô jé nhâng bekô râ nghut lhê.

☆ 1:17 Mht 17:5; Mrk 9:7; Luk 9:35

² Byù myo myo gi, haú bâng é ahoq ahî hkyô má cháng kó râ eq, tengmán hkyô lé taí hpoî pyám nhâng kó râ nghut lhê. ³ Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhâng to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lháng a ha bûn é za, ngarâi ming má hkyô pyám luî, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê. ⁵ Yhang gi, tarâ a hkunggâ é byu pé lé dowû tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyâm é đông mara dam byi luî, tarâ a hkungga bâng chyáng dut lò râ hkyô é azông kut tô é nghut ri; ⁷ nghut kôlhang, tarâ a chûng bâng é achayut asak duì hkyo é yanmai myit wui myit hke huí é, haú dingmán sù Lot lé hkyi htoq yu é nghut ri; ⁸ (hkâsu mù gâ le, dingmán sù haú gi, nyí hkangmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.) ⁹ Haú su nghut é nghut jáng, Yhumsîng gi, tarâ hkunggâ é byu pé lé, wuîhke hkyô mai hkâsu kut hkyi htoq yû râ eq, a dingmán é bang lé, tarâ jéyáng é buinyì jé shoq, dam byî é hkyô lé xoq kut nyi é u má hkâsu kut zûi zing to râ lé sê lhê. ¹⁰ Haú yubak gungshô é htên byoq sê é yut yut ô naù hkyô châng é eq ahko ahkáng lé wú tiq bâng chyáng, haú hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang

nghut kôluî, mauhkûng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é đông lumù gansâng hkyô a wám kut kó nghut ri. ¹² Nghut kôlhang, haû sará apyoq pé gi, yhumsing a sê gyô é hkyô pé lé rhoi dang taî akô. Yhangmoq gi, haû chyup yu é hui luî, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haû pé su, yhangmoq le, htên byoq byuq kó râ nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poî kut kô é hkûn, mhaû é lé yhangmoq é ngón hkyô kut kômù, agè agau é eq achayut é bang nghut akô. ¹⁴ Yhangmoq é myoqji pé má gi, su-myi sulàng lú hkyô bying zan to kômù, mara kut é hkyô lé hkânám le a hkying kó nghut ri; yhangmoq gi, a gingting é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômù, nhing pyâm é hui bang nghut akô. ¹⁵ Yhangmoq gi, haû dîng é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yhang kut shut é hkyo é yanmai, logúng èq tân mhoqshit é hui ri; dang a dat nyo é logúng haû gi, byu é htê đông dang taî lò mù, myiqhtoi hpó a gyîng é hkyô lé hkûm tang pyâm ri.

¹⁷ Byù hau bang gi, wui a bo é wuihtung eq, laidûn èq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaû lé lajang to bê nghut ri.

¹⁸ Hkâsu mù gâ le, yhangmoq gi, asôm gyáng dang lé taî mù, yubak gungshô é yut yut ô nau é hkyô đông mai, haû

shut shai é hkyô má asak dui nyi é mai asik za h pang htoq lo é bang lé, mhoq hpyoq yù akô nghut ri. ¹⁹ Yhangmoq gi, haú bang lé luthkyô byi râ gidiq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô naù hkyo é jùn dut nyi akô; haì mù gâ le, byù rayuq gi, yhumsîng lé hai èq up sing le, hai é jùn nghut lhê. ²⁰ Byu pé gi, nga-nhông é Yhumsîng eq hkyi yù Sù nghut é Yesuq Hkrisduq lé sê é dông mai, mingkân é agè ashop hkyô mai wó h pang lut htoq bê nghut kôle, yhangmoq lé hau èq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ nghut lhê. ²¹ Haù dingmán é hkyô lé yhangmoq sé luí, yhangmoq lé ap byì to bê nghut é chyoiyúng hkunmó lé tô pyâm to mù lhing taù ló byuq kô é htoq má, haù hkyô lé a sê é gi, yhangmoq é matú je gè kó râ nghut lhê. ²² "Hkui gi, yhang hpat tô é lé dum taù zô lhê." gâ é eq, "Waq gi, chí pyám byì é htâng, yhâng é galhu htum má dum taù lhù lhê." ☆ gâ é sanghkyang gi, yhangmoq chyáng dik bê nghut ri.

3

Haù Yhumsîng Jé Lé Râ Buinyì

¹ Chyitdap é luzúm wuì ê, shì gi, nungmoq lé ngò í dá nghù râ dà m ká byì kat é laiká nghut lhê. Laiká shì í lhum má, nungmoq é sansêng é i-myit lé lhoq toq râ matú taì pùn kat é laiká nghut lhê. ² Haù gi, chyoiyúng myiqhtoì pé mai laì lò bê hkùn taì tô é dang pé eq, nga-nhông é Yhumsîng eq hkyi yù Sù mai, nungmoq é lagyô pé dông byì to bê nghut é hkunmó lé, ngò, nungmoq lé bun nhâng naù luí nghut lhê.

☆ 2:22 Sânghkyang 26:11

³ Sâng-hi má, ló htâng é buinyì pé má yhumsing é agè ashop ô nau hkyô má cháng luí taí hpoi bang htoq lô râ nghut é lé, nungmoq sê gyô to ra râ nghut lhê. ⁴ Haú bang gi, "'Dum jé lé râ' ga Yhang gidiq byî é gi, hkâmá lhu? Nga-nhông é íchýí îwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taí kó râ nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkung pé joq é eq, myigùng gi, wuì mai dut htoq nhâng mù, wuì dông hpan tô é hkyô lé, a sé gûn kut pyâm akô nghut ri. ⁶ Wuì hau èq sheq, haú hkun lhê é mingkan lé dowuì títg mù, lhoq htên pyâm é nghut lhê. ⁷ Ahkui lhê é mauhkung pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau èq Yhang hkong to bê nghut ri.

⁸ Nghut kôlhang, chytidap é luzúm wuì ê, haú Yhumsing é hí má, ra-nyí gi, zanwut rahkyîng dông, zanwut rahkyîng gi, ra-nyí dông nghut é hkyô shî lé, hkâtô-myhí kó. ⁹ Haú Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkanmó myit lhîng râ lé za ô nau mù, nungmoq lé myit hîng byî nyi é nghut lhê.

¹⁰ Nghut kôlhang, haú Yhumsing é buinyì gi, hkau sù su a bûn nùng má jé râ nghut lhê. Haú buinyì má, mauhkung pé gi, mying hum htê eq byuq byuq râ nghut lhê; duqbó-gûng pé gi, myí èq lhoq htên pyâm é hui luí, myigùng eq haú mâ é joq mijoq gi, nyé gyó byuq râ nghut lhê.

¹¹⁻¹² Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasû é byu pé dut ra râ lhu? Nungmoq gi, haú Garai Gasâng é buinyì lé ho nyi é eq buinyì haú hân za jé râ lé ô nau nyi é hkûn, chyoiyúng é

eq tarâ hkunggâ é asak duì hkyô dông nyì ra râ nghut lhê. Buinyì haù gi, mauhkông pé lé, myí èq lhoq htên pyám luí, duqbó-gông pé le, lûm nyé luí, nyé yui pyâm é buinyì dut râ nghut lhê. ¹³ Nghut kôlhang, nga-nhúng gi, Garaí é danggidiq nghut é, dingmán hkyô é yhûm, mauhkông asik eq myigùng asik lé, myoqbyu nyi é bang nghut lhê.

¹⁴ Haù nghut mù luí, chyitdap é luzúm wuì ê, nungmoq gi, haù hkyô lé myoqbyu é bang nghut kô é yanmai, Yhang é hí má achaq achyut a dut é eq mara hûn râ hkyô a bo é za, Yhang eq nguingón nyì râ hkyô lé gyai yhang shikut nyì keq. ¹⁵ Nga-nhúng é chyitdap gumang Poluq gi, yhang lé, Garai Gasang byì tô é hpaqchyì byéng-yá èq, nungmoq chyáng ká byi bê eq rajung za, nga-nhúng é Yhumsing é myit hîng hkyô gi, hkyi yù hkyô nghut é lé matsîng to keq. ¹⁶ Poluq gi, yhang kê é laiká pé banshoq má, haù hkyô pé eq séng luí rajung za kê shit tô ri. Yhang é laiká hkaù pé má, ra-am gi, sê gyo wuì é hkyô pé bo é yanmai, a mhoq wú é bang eq a gingtîng é bang gi, gotû Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsîng htên byoq hkyô kut yu nyi akô nghut ri.

¹⁷ Haù mù luí, chyitdap é luzúm wuì ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyo èq nungmoq lé a wó shuí nghoq yù râ eq, nungmoq é gaù é jowò mai a wó byit gyó byuq sháng gaq, yhumsing gùng yhumsîng upzúng nyì keq. ¹⁸ Nga-nhúng é Yhumsîng eq hkyi yù Sû nghut é Yesuq Hkrisduq é jeju eq hpaqchyì hkyô má, nungmoq kô myhang lò kó sháng gaq. Hpungwup shing kang gi, Yesuq Hkrisduq chyáng, ahkuì le, ahtum abyuq le, ru joq nyì sháng gaq ô! Amen.

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee